

## పేతురు రెగిడ్లి మొదొల్చి ఉత్త్రమ్ బారిక్ జలో పేతురు రెగిడ్లి మొదొల్చి ఉత్త్రమ్

1 యేసుక్రీస్తు బారికి జలో పేతురు, పొంతు, గలతీయ, కప్పదొకియ, ఆసియా చి బితునియ ప్రదేసిమ్లుతె సొంత టాన్ నెంజిల వేర వేరతెచ తిల నంపజలస్క, రెగిడ్లి ఉత్త్రమ్.

2 యేసుక్రీస్తుచి ఇస్తుమ్ రితి తుమ్ ఇండుక మెన, జోచి సువి జలి లోయిక తుమ్చి పాపుమ్ వుంచి జంక మెన, అబ్బోన్ జలో దేముడు \* అగ్గె తెంతో ఉచర తుమ్క నిసాన అస్సె, చి దస్సి జతి సెక్తి తుమ్క తంక మెన, తుమ్ జోచయ్ మాన్సుల్ జంక మెన, తుమ్క దేముడుచి సుద్ది తిలి ఆత్మ సుద్ది కెర అస్సె. జలె, ప్రబుచి దయ, జోచి సేంతుమ్ తుమ్క కొత్కు నెంజితె తవున్.

### దేముడు దిలి రచ్చనచి రిసాచి దయిరిమ్

3 అమ్చొ ప్రబు జలో యేసుక్రీస్తుచొ దేముడు అబ్బోన్క జోబర! జోచి ఎదివాట్ దయక, అమ్క నొవర్ జెర్మవ అస్సె. యేసుక్రీస్తు మొర్ను తెంతో అన్నె జివ్ జా ఉట్లీన్చి రిసా ఆమ్ కి అన్నె జివ్ జా ఉట్ట పరలోకుమ్తె గెచ్చుమ్దే మెన

4 జివుమ్ తెన్ బెద తిలి ఆసతె అమ్క నొవి జెర్మున్చి రిసా, నే గార్ జతి, కల్లి నెంజిలిసి పరలోకుమ్తె తుమ్క దేముడు దిలి వాట తుమ్క రకితయ్.

5 ఆకర్ దీసల్క పూర్తి డీసుక తెయార్ తిలి రచ్చన తుమ్క నే పిట్టుక మెన, దేముడు ప్రబు జోచి సెక్తిక తుమ్చి నముకుమ్ వాట్ తుమ్క తోడ్ అస్సె.

\* 1:2 1:2 రోమియల్ 8:29-30, ఎఫెసు 1:5, 11-12 చి తీతు 1:1 డెక.

6 ఆకర్ దీసల్చి రచ్చనచి రిసా తుమ్ సర్ల తెన్ జతను. గని రకుమ్ రకుమ్చ కస్తుమ్ తెన్ అప్పె ఇదిల్ కాలుమ్క తుమ్క దుకుమ్ జయెదె.

7 జేవ్ అర్ల సేడ్డిన్తె కిచ్చొ లాబుమ్ మెలె, తుమ్చి నముకుమ్క సత్తిమ్చి గే నెంజె గే తుమ్ జేవ్ అర్ల సేడ్డిన్తె డీసెదె. బజర్క 'సత్తిమ్చి గే నెంజె గే' మెన రుజ్జు తంక మెలె, జేవ్క ఆగితె పరిచ్చ కెరుల. బజార్ జలె, విలువ జలెకి పాడ్ జతి వస్తువ. జలె, తుమ్చి నముకుమ్ బజర్చి కంట ఒగ్గర్ విలువ, చి జా పరిచ్చ జలె, జిన్లె, యేసుక్రీస్తుచి పరలోకుమ్చి ఉజిడి గవురుమ్ పూర్తి డీస్తి ఆకర్ దీస్క జా తుమ్చి నముకుమ్క 'సత్తిమ్చి' మెన, జోచి పరలోకుమ్చి ఉజిడెతె గవురుమ్తె తుమ్క జో వాట దెయెదె.

8 జోక తుమ్ సొంత అంకివొ తెన్ నే దెకిలెకి, జోక ప్రేమయ్ అస్సున్. జోక అప్పె దెకుక నెంజెలి కి, జోక నంపజా అస్సున్, చి మాన్సు అర్దుమ్ కెరుక నెత్తిర్తి పరలోకుమ్చి ఎదివాట్ సర్లనంతోసుమ్ తుమ్చి పెట్టి బెరయ్ అస్సె.

9 తుమ్చి జా నముకుమ్చి రిసా, తుమ్చ ప్రానుమ్క రచ్చన తుమ్క దొర్కు జా అస్సె.

10 తుమ్క దొర్కు జతి ఈంజ రచ్చనచి రిసాచ దేముడుచ కబుర్లు పూర్లమ్ సంగిలన, ఈంజయి రచ్చనచి రిసా ఒగ్గర్ పుసితె తిల.

11 కిచ్చొ పుసీల మెలె, "అమ్చి పెట్టి క్రీస్తుచి ఆత్మ సంగిల జో సేడుక తిల బాదల్ జో పణ్ణిక గవురుమ్ జంక తిలిసి కేన్ సమయుమ్క జర్లు జంక, కీసి సమయుమ్క జర్లు జంక అస్సె?" మెన పుసీల.

12 దేముడు జోవయింక దెకయ్లన్. కిచ్చొ దెకయ్లన్ మెలె, జేవ్ జా కబుర్ సంగితి సేవ కెర్తిక జోవయించి రిసా నాయ్, గని తుమ్చి రిసాయి మెన దేముడు జోక దెకయ్లన్<sup>†</sup>. జా సుబుమ్ కబుర్ తుమ్ రచ్చించుప జతిన్చి రిసా, పరలోకుమ్ తెంతో తెద్దయ్లి దేముడుచి

<sup>†</sup> 1:12 1:12 మెలె, జేవ్ పూర్లచి కాలుమ్ నాయ్, గని పణ్ణిక అయ్లనచి కాలుమ్ యేసు బార్ జంక తిలి, చి ఎక్కి యూదుల్ నాయ్, గని యూదుల్ నెంజెలన కి యేసుచి తెడిచి రచ్చన నజనుక ఈంజయి కాలుమ్ అవ్కాసుమ్ దొర్కు జలి. రోమియల్ 11:11, 25, గలతీయల్ 3:8, 9, 14, ఎఫెసు 3:6, చి పేతురు రెగిడ్లి ఏక్ నంబర్ ఉత్త్రుమ్ 1:20 దెక.

సుద్ది తిలి ఆత్మచి తెడి, తుమ్క నుబుమ్ కబుర్ బోదన కెర్ల మాన్సుల్చి అత్తి జానయ్తెయ్. జా నుబుమ్ కబుర్తె తిలిసి ఎత్తి పూర్తి అర్దుమ్ కెరనుక పరలోకుమ్చ దూతల్ కి ఒగ్గర్ ఆన తెన్ అస్తి.

### దేముడుచి సుద్దిచి రితి ఇండ

13 జలె, ప్రబు జలొ యేసుతెచి రచ్చన తుమ్కయ్ దొర్కు జలి రిసా, తుమ్చ మెన్సు తుమ్ డిట్టుమ్ కెరన, నే మచ్చిల్ రితి, ముద్దొ కెరన, తెలివి తా, జో అన్నె ఉత్త్ర జా జోచి పరలోకుమ్చి ఉజిడి గవురుమ్ పూర్తి డిస్తి ఆకర్ దీసిచి రిసా ఆన తా, తుమ్క దెతి దయచి రిసా ఉచర, జా రచ్చన కచితుమ్ దొర్కు జతి రితి పూర్తి దయిరిమ్ జా, జయ్యి నముకుమ్ పూర్తి డిట్టుమ్ దెరన.

14 జో ప్రబుచి ఇస్టుమ్ నిదానుమ్ కెర్ల బోదల్ జా, తుమ్ అగ్గె నేన్లి పొదిచ తిల ఆగ్గెచి గార్ ఆసల్ రితి తుమ్ ఇండ నాయ్.

15 తుమ్క నిసాన బుకార్లోసా కీసి పూర్తి సుద్ది అస్సి గే, తూమ్ కి కిచ్చొ కామతె కి కెయక తెయక దస్సి సుద్ది తెన్ ఇండ.

16 దేముడుచి కొడెతె,  
‡“ఆవ్ కీసి సుద్ది అస్సి గే,  
తూమ్ కి ఇసి సుద్ది తంకయ్”  
మెన రెగిడ్లన్.

17 కక్కుయ్ మొకమాటుమ్ నే దెకితో, ఎత్తి మాన్సుక జేవ్ కెర్ల కమొ కొల్లి తీర్పు కెర ‘చెంగిల్’ గే ‘గార్’ గే సంగితోసాక ‘అబ్బొ’ మెన ఉంక్రయ్తను జలె, ఈంజ తుమ్చి సీసాంత టాన్ నెంజిలిన్తె తుమ్ గడియ జితె పొది జోవయించి మరియాద దెకయ్తి రితి జాగర్త తెన్ నిదానుమ్ ఇండ.

‡ **1:16** 1:16 లేవీయకాండుమ్ 11:44-45, 19:2, 20:7. **§ 1:17** 1:17 జేవ్ నంపజలన వేర వేరతె నంపజలన నెంజిలనతె జితె తిల, పడ్డొ ‘సాంత టాన్ నెంజిలిసి’ మెలన్క అన్నె కిచ్చొ అర్దుమ్ తయదె మెలె, పరలోకుమీ నంపజలనచి సాంత టాన్ జయెదె, చి రిసా బూలోకుమ్క ‘అమ్చి సాంత టాన్ నెంజె’ మెనుక జయెదె. కొరిందిల్క పవులు రెగిడ్లి దొస్సి నంబర్ ఉత్త్రమ్ 5:1-2, షెలిఫ్పియల్ 3:20, ఎబ్రీయల్ 11:9, 10, 13.

18 తుమ్చ పూర్గుల్ దిలి అగ్గెచి కామ్క నెంజిలి ఇండుక తెంతో, తుమ్ విడ్డల్ జంక మెనయ్ దేముడు ప్రబు తుమ్క నెతోవ్లొ మెన జాన్సు. కీసి నెతోవ్లొ మెలె, వెండి గే బజార్ గే దస పాడ్ జత ప్స్తువల్ దా గెనె నాయ్,

19 గని కిచ్చొ గార్ నెంజిలి కిచ్చొ మచ్చల్ సర్దల్ నెంజిలి గొరైక బలి దిలి రితి జోచొ పుత్తున్ జలొ క్రీస్తుచి లొయి \*సుచ దిలన్.

20 ఈంజ లోకుమ్ జెర్మిన్ నే జతె అగ్గె తెంతో దేముడు అబ్బొసి “క్రీస్తు రచ్చించుప కెర్తొసొక తెద్రయిందె” మెన నిసొన్ల తిలన్, గని కెయ్ క్రీస్తు బార్ జలన్ మెలె, తుమ్చి రిసొయి ‘రచ్చించుప జతు’ మెనయ్ ఈంజ ఆకర్ నమయుమ్తెయ్ బార్ జలన్.

21 క్రీస్తుచి రచ్చన నజన తా జోచి తెడి దేముడుచి ఉప్పిరి తుమ్చి నముకుమ్ తియ అస్సున్. “జో రచ్చించుప కెరెదె” మెన, జోచి ఉప్పిరి దయిరిమ్ జా అస్సున్. మెలె, క్రీస్తుక జో మొర్ను తెంతో జియడ గవురుమ్ కెర్లొచి రిసొ, తుమ్చి నముకుమ్ తుమ్చి దయిరిమ్ దేముడుచి ఉప్పిరి అస్సె.

22 జలె, దేముడుచి సత్తిమ్ కోడు దెరన జా కోడ్ రితి ఇండుక ఒప్పన తుమ్చి ఆత్మక సుద్ది కెరన అస్సున్, చి దస్సి జా తిలె, కిచ్చొ మాయ నెంతె తుమ్ ఏక్ బావొక అన్నెక్లొ ప్రేమ కెరుక జయెదె. జాకయ్, తుమ్చి పెట్టి పూర్తి నిదానుమ్ ఎక్కిలొక ఎక్కిలొ ప్రేమయ్ కెర.

23 తుమ్ నొవర్ జెర్మ అస్సున్. జా నొవర్ జెర్మన్ జలిసి నాసెనుమ్ జతి బి గలిలిసి నెంజె, గని జివ్ తిలి, కెయ్క కి తా గెతి దేముడుచి కోడు తెన్ ఈంజ జెర్మన్ తుమ్ జెర్మన్ జలదు.

24 దేముడుచి కోడుతె జో రెగ్దవ తిలి రితి,  
+“ఈంజ లోకుమ్చ మాన్సుల్ ఎత్తి చివ్వర్చి రితి జతతి,  
జోవయించి గవురుమ్ చివ్వర్చ పుల్లొచి రితి జతయ్.  
జా చివ్వర్ వాడుప జతయ్,

\* 1:19 1:19 యోహాను 19:17-37, ముక్కిమ్క 34, 37. లూకా 22:44, మత్తయ్ 26:28, లూకా 22:30, యోహాను 6:53-56. † 1:24 1:24 యెసయా 40:6-8.

జేవ్చ పుల్లో సుకా గెచ్చు గెస్త గెతతి.

25 దేముడుచి కోడు, మాత్రుమ్,  
కెయఁక తెయఁక తాఁ గెచ్చెదె”

జలె, జీవ్ దెతి తాఁ గెతి జోవయించి కోడు కిచ్చొ మెలె, తుమ్క బోదన  
కెర్తి సుబుమ్ కబుర్.

## 2

1 జాకయ్, దేముడు చెంగిల్ సుదొ మెన తుమ్ చక దెక తిలె,  
కుస్సిరుమ్ ఎత్కి, మోసిమ్బుద్ది ఎత్కి, మాయబుద్ది ఎత్కి, గోస  
జతిసి ఎత్కి, దూసుప కెర్తిసి, గోస లట్టబ్తిసి ఎత్కి. తుమ్తె తెంతొ వెంట  
గెల.

2 తుమ్చి రచ్చనతె వడ్డితి రిసా, నొవర్ జెర్మిల బోదల్ రిత జా, కిచ్చొ  
వేరచి నే బెదిలి సత్తిమ్ తిలి దేముడుచి కోడు జలి ఆత్మయి దూదుక  
తుమ్ ఆస జా తంక.

3 జాకయ్, జా దయచి రచ్చనతె తుమ్ డిట్టుమ్ జా తా.

4 మాన్సుల్ నెసిలో గని దేముడుచి మొక్కె గవురుమ్ తిలో విలువ  
జలో జీవ్ తిలో, జీవ్ దెతో \*పత్రె తుమ్ జా.

5 జోతె అయ్లె, తూమ్ కి జీవ్ తిల పత్రల్ రిత జా, ప్రబుచి ఆత్మతె  
గేర్ బెద బందితి రితి సుద్ది తిల పూజర్లు జా, దేముడుచి సేవతె బెద,  
జో యేసుక్రీస్తుచి తెడిచ దేముడు మెన్సితె ఆత్మ బలుల్ దెతస జస్సె.

6 దేముడుచి కొడొతె

† “ఈందె, సీయోను డొంగ్రుతె, ఏక్ పత్తుర్క టీవడ్డసి.

అంచి గేరుక బోడిపత్తుర్ జో జా, ఎత్కిక ఆదారుమ్ జయెదె.

జో ఆవ్ నిసాన్లొ గవురుమ్ కెర్లొ, అంక ఒగ్గర్ విలువ జలొసా జయెదె.

జోవయింక కో నంపజవుల గే,

కచితుమ్ జేవ్ అంచి మొక్కె లాజ్ జంక నాయ్”

మెన రెగ్డ అస్సె.

\* 2:4 2:4 యేసుక్రీస్తుచి రిసా సంగితయ్. లూకా 20:17-18, మత్తయి 21:42-44,  
మార్కు 12:10, రోమియల్ 9:32-33. † 2:6 2:6 యెసయా 28:16.

7 జాకయ్, తుమ్ నంపజలసక జో విలువ జతయ్. గని నంపనెంజలసక జో కీసి జతయ్ మెలె, దేముడుచి అన్నెక్ కోడుతె అస్సె. కేన్ కోడు మెలె,

‡“ ‘కామ్క నెంజె’ మెన కీబందిలస జో ఏక్ పత్తురు పిట్టపుక మెన ఉచర్లె కి, జోయ్యి పత్తురు బోడిపత్తుర్ జయి అస్సె” మెన రెగిడ్డిసి.

8 అన్నెక్ కి,

\*“నంప నెంజలస పిసిర్తో పత్తురు జో జయెదె, జోవయింక సేడయ్తో సాప్ర జో జయెదె”

మెన రెగిడ్డిసి. ఈంజ కోడు కీసి నెరవెర్చుప జతయ్ మెలె, ‘జర్లు జయెదె’ మెన అగ్గె తెంతో దేముడు సంగిలి రితి, జోవయించి కోడు నే నూన్లి రిసా జేవ్ నే కెర్లి రిసా వాట్ పిట్టవన్తతి. జయి జోవయించి తీర్పు.

9 గని తుమ్క, దేముడు కీసి దెకితయ్ మెలె, ‘ఆవ్ నిసాన్లి సెకుమ్చ’ మెన, ‘అంచి రాజిమ్చ †పూజర్లు’ మెన, ‘అంచి సుద్ది తిల జాతి’ మెన, ‘అంచ సొంత ప్రెజల్’ మెనయ్ జో దెకితయ్. అందర్ తెంతో తుమ్క బుకారా కెర, జోచి పరలోకుమ్చి ఉజిడతె గవురుమ్తె బెదయ్లో యేసు ప్రబుచ ఒగ్గర్ వెల్లో కమొచి రిసా తుమ్ సాచి నూనవుక మెనయ్ తుమ్క దస్సి నిసాన అస్సె.

10 అగ్గె తూమ్ ‘దేముడుచ మాన్సుల్ ఆము’ మెననుక నెతిర్లదు, గని అప్పె దేముడుచ ప్రెజల్ జా అస్సున్. అగ్గెయి తుమ్క కన్కారుమ్ దొర్కు జయె నాయ్, గని అప్పె దేముడు తుమ్క కన్కారుమ్ దెక రచ్చించుప కెర అస్సె.

‡ 2:7 2:7 కీర్తనలు 118:22. § 2:7 2:7 ‘దేముడుచి గుడి బందిలస’ మెలె, జోవయింక నంప నే కెర్ల యూదుల్చ వెల్లెల మాన్సుల్. ఎత్తి అదికారుమ్ తిలో దేముడుక బక్తి కెర్ల యూదుల్క సికడ్తన, జేవ్, గని యేసుక ‘జోయ్యి ఎత్తి అదికారుమ్ తిలో దేముడు తెద్రయ్లో క్రీస్తు రచ్చించుప కెర్లొసా’ మెన ఒప్పునుక నెసిల, మార్ల. మత్తయి 21:42-46 దెక.

\* 2:8 2:8 యెసయా 8:14. † 2:9 2:9 డీసయ్లిసి 1:6 దెక.

11 ప్రేమ తిల బావుడ్లు, తుమ్ క ఆవ్ కిచ్చొ బతిమాల్ప జా సంగితసి మెలె, తుమ్ గడియ తుమ్ చి సొంత టాన్ నెంజిలిన్ తె అన్నున్. జలె, ఈంజ తుమ్ చి సొంత †టాన్ నెంజిలిన్ తె తుమ్ జితె తా, తుమ్ చి ఆత్మచి ఉప్పిరి యుద్దుమ్ కెర్త ఈంజ లోకుమ్ చి ఆగుచ ఆసల్ జర్గు నే కెర్తి రితి, తుమ్ ముద్దొ కెరన.

12 దేముడుక నేన్ల యూదుల్ నెంజిల ఒత్తచ మాన్సుల్ తె తా తుమ్ చెంగిల్ బుద్ది తెన్ ఇండ, చి జోవయింతె ఏక్ వేల కో గే తుమ్ క 'తప్పల్ కెర్తన' మెన దూసుప కెర్తె, తుమ్ సత్తిమ్ ఇండితిన్ చి రుజ్జు జేవ్ దెకిలె, ప్రబు తీర్పు కెరుక జెతి దీసిక తుమ్ చి రిసా దేముడుక గవురుమ్ కెరుల.

### అధికారుల్ క మరియాద దెకుత్

13 ప్రబుచి మరియాద టీవడ్డి రిసా, ఈంజ లోకుమ్ చొ ఎత్తి అధికారిక తుమ్ మరియాద దెక. దేసిమ్ క వెల్లో జా ఏలుప కెర్తొసాక కి,

14 'నేరిమ్ కెర్తనక సిచ్చ కెర్తు' మెన జవున్ 'చెంగిల్ కెర్త మాన్సుల్ క బవుమానుమ్ దెతు' మెన జవున్ దేసిమ్ క ఏలుప కెర్తొసా తెద్రయ్ ల అధికారుల్ క కి తుమ్ మరియాద దెక.

15 కిచ్చొక మెలె, తుమ్ సత్తిమ్ ఇండితిన్ తెన్, నేన్ల మాన్సుల్ చి వెర్రిక, తప్పు మెన తుమ్ రుజ్జు దెకవ ముద్దొ కెరుక దేముడుచి ఇస్టుమ్.

16 కి ఆగ్గుల్ క గొతిమాన్సుల్ జల రిత తుమ్ జియ నాయ్. దసచ నెంజున్. గని 'ఆగ్గుల్ చ గొతిమాన్సుల్ నెంజుమ్, చి ఇస్టుమ్ అయ్ లి రితి జింక జయెదె' మెన తుమ్ ఉచర నాయ్, దస్సి పాపుమ్ తె గెచ్చ నాయ్. గని, దేముడుచ కామ్ కెర్తన, జోచయ్ గొతిమాన్సుల్ రిత జా, జోచి ఇస్టుమ్ రితి తుమ్ ఇండ.

‡ 2:11 2:11 జేవ్ నంపజలన వేర వేరతె నంపజలన నెంజిలన తె జితె తిల, పడ్డొ 'సొంత టాన్ నెంజిలిసి' మెలిన్ క అన్నె కిచ్చొ అర్దుమ్ తయెదె మెలె, వరలోకుమీ నంపజలన చి సొంత టాన్ జయెదె, చి రిసా బూలోకుమ్ క 'అమ్ చి సొంత టాన్ నెంజి' మెనుక జయెదె. కొరిందిల్ క పవులు రెగిడ్డి 2 నంబర్ ఉత్తమ్ 5:1-2, వీలిప్పియల్ 3:20, ఎబ్రీయల్ 11:9, 10, 13.

§ 2:16 2:16 గలతీయల్ 5:1.

17 ఎత్కిజిన్ మాన్సుల్క తుమ్ మరియాద దెక. బావుడ్లు జల నంపజలన్క ప్రేమ దెక. దేముడుక తుమ్ బియఁ. దేసిమ్క వెల్లో రానొక గవురుమ్ కెర.

18 గొతిమాన్సుల్ కి జలెకి, తుమ్చ ఎజొమాన్సుక మరియాద దెక. \*మెత్తన తా కన్కారుమ్ దెకిత ఎజొమాన్సు జేవ్ జలెకి, కన్కారుమ్ నేన్లన జేవ్ జలెకి జేవ్ సంగిలి కోడు కెర.

19 కిచ్చొక మెలె, తప్పు నే కెర్లె కి, కచి గే అత్తి తుమ్చితె కో అర్ల సేడ దేముడుచి గవురుమ్ టీవణ్డి రితి ఓర్పువ జలె, జో దేముడు జో మాన్సుక 'చెంగిలొసా చొ' మెనెదె.

20 తుమ్ తప్పు కెర్లె రిసా దెబ్బల్ కయ్లె పొది సేంతుమ్ తెన్ ఓర్పువ జలె, కిచ్చొ పున్నిమ్ నాయ్! గని, తుమ్ సత్తిమ్ కెర్లె కి సిచ్చ సేడ్లె సేంతుమ్ తెన్ ఓర్పువ జలె, దేముడు తుమ్క 'చెంగిలచ' మెన్తయ్.

21 దస్సి సేంతుమ్ తెన్ తుమ్ తంక మెనయ్ దేముడు తుమ్క బుకారయ్ అస్సె. కిచ్చొక మెలె, తుమ్చి పాపుమ్ గెస్సు మెనయ్ క్రిస్తు బాదల్ ఓర్పువ జా, తూమ్ కి జోచ అజ్జుల్తె ఇండుక మెలి కోడు తుమ్క జో వాట్ దెకవ అస్సె.

22 జో, జలె, కెయ్య కిచ్చొయ్ పాపుమ్ కెరె నాయ్. కిచ్చొయ్ మోసిమ్ కోడు అట్టబె నాయ్.

23 మాన్సుల్ జోక దూసుప కెర్లె, జోవయింక జో దూసుప నే కెర్తె తుక్లె తిలొ. జోక జేవ్ అర్ల కెర్లె కి, జోవయింక జో బియఁడె నాయ్, గని సత్తిమ్ తీర్పు కెర్తె దేముడు అబ్బొన్చి అత్తి జోచి జీవ్ జో సార్పు కెర దిలన్.

24 జో యేసు సొంత ఆమ్ కెర్లె పాపల్ జోచి ఆఁగి వయన, సిలువతె మొర్లన్. పాపుమ్ ముల అమ్చి సొంత ఆత్మక మొర్ల రిత జా సత్తిమ్ ఇండితి రితి అమ్ జింక మెనయ్. జో యేసు కయ్లె దెబ్బలు తుమ్క చెంగిల్ కెర అస్సె.

\* 2:18 2:18 ఎపెసు 6:5-10, కొలొస్సియల్ 3:22-4:1.



25 తుమ్ అగ్గెయి వాట్ పిట్టవన చెదుర్పు జల మెండల్చ రిత జా తిలదు, గని అప్పె తుమ్చ ఆత్మల్ రకితో చెంగిలొ గొవుడుతె అన్నె బుల జా అస్సున్.

### 3

#### తేర్బోదల్ బుద్ది ఇండుక

1 తుమ్ తేర్బోదల్ కి, దాక్ కెరన తుమ్చ మున్నర్లుచి అదికారుమ్క మరియాద దెక. తుమ్ దస్సి ఇండిలె, జోవయింతె సగుమ్జిన్ అప్పెచి ఎదక ప్రబుచి కొడొ రితి నే ఇండిలెకి, జోవయించ తుమ్ తేర్బివొ ప్రబుచి కోడు నే సికడ్లెకి,

2 తుమ్చి సత్తిమ్చి ఇండుక, మరియాదచి ఇండుక, జేవ్ దెక దెక, ప్రబుక నంపజా, మార్పుప జవుల.

3 తుమ్ తేర్బోదలు “\*నూటి కెరనుమ్దె” మెలె, మాములుమ్ డిస్టిన్క ముక్కిమ్ నే ఉచరై, సెండి నూటి కెరంతిన్ జవున్, బజార్ గట్ట తియంతిన్ జవున్, చెంగిల చెంగిల పాలల్ బందంతిసి గలంతిసి జవున్ తుమ్ విలువ దెక నాయ్.

4 గని, తుమ్క కిచ్చొ నూటి కెర్పు మెలె, దేముడుచి మొక్కె ఒగ్గర్ విలువ జతి, కెయఁక నాసెనుమ్ నే జతి పేట్చి తెడిచొ మాన్సు ప్రబుచి మెత్తన బుద్ది, సేంతుమ్ బుద్ది జా తుమ్చి పెట్టి తవున్.

5 అగ్గెచ పొదులె దేముడుచి ఉప్పిరి నముకుమ్ తిల తేర్బోదల్ జోవయించి సుద్ది తిలి ఆత్మచి నూటిక తెయార్ జా మున్నర్పుల్చి అదికారుమ్క మరియాద దెకితె తిల.

6 పూర్ణుమ్చి సారా దస్సి మున్నున్ జలొ అబ్రాహామ్క ‘ఎజొమాని’ మెన, జోచి అదికారుమ్క మరియాద దెకితె తిలి. జోచి కోడు సూన్తె తిలి. తూమ్ కి సత్తిమ్ ఇండిలె, తుమ్ కిచ్చొక కి బమ్మ జంక నాయ్, చి జా సారాచ బోదల్ రిత జస్సె.

#### మున్నుబోదల్ తేర్బివొక కిసి దెకుక

\* 3:3 3:3 ఎవెసు 6:5-10, కొలోస్సియుల్ 3:22-4:1.

7 దస్సి, తుమ్ మున్నుబోదల్, తుమ్చ తేర్దివొక బమ్మ నే కెర్తి బుద్ది తెన్ పోస. జోవయింతెన్ జియ తేర్బోదక తొక్కి సెక్తి తయెదె మెన చిన, తుమ్తె ఎత్తి మున్నుబోద తేర్దిక మరియాద్ దెక. జోవయింక జాకయ్ కిచ్చొక దొగుతెర ఇసి ప్రేమ దెకుక మెలె, తుమ్ ఎత్తి దొగుతెరకయ్ దేముడు జోవయించి దయక జోవయించి రచ్చన వరుమ్చి వాట దా అస్సె. తుమ్ మున్నుబోదల్ తుమ్చ తేర్దివొక ఇసి ప్రేమ దెకిలె, అడ్డు నెంతె దేముడు తుమ్చ ప్రార్దనల్ నూనెదె. తుమ్చ ప్రార్దనల్క అడ్డు నే జతి రితి జోవయింక ఇసి ప్రేమ దెకుత్.

### ఎక్కిలోక ఎక్కిలో ప్రేమ తెన్ తంక

8 జలె, తుమ్ ఎత్తిజిన్ ఎక్కి ప్రేమయ్ తా, ఎక్కిలోక ఎక్కిలో కన్కారుమ్ దెక, నంపజలస ఎత్తిజిన్క బాబేన్ దెకితి ప్రేమ దెక, ముద్దు కెర, సొంత గవురుమ్ నే ఉచరంతె, ఎక్కి మెన్ను తెన్ తా.

9 ఎక్కిలోక అన్నెక్లో అర్ల కెర తిలె, జో అర్ల సేడ్డొసా అర్ల కెర్లొసాక అన్నె అర్ల కెరుక పోసి. ఎక్కిలోక అన్నెక్లో దూసుప కెర తిలె, దూసుప జలొసా, దూసుప కెర్లొసాక అన్నె దూసుప కెరుక పోసి. జో ఎక్కిలోక జో అన్నెక్లో 'చెంగిల్ తవున్' మెన దెకున్. తుమ్క దేముడుచి దయ దొర్కు జవున్ మెనయ్ తుమ్ ఇసి ప్రేమయ్ ఇండుక మెనయ్, తుమ్క జో నిసాన అస్సె.

10 పూర్గుమ్ దేముడుచి కొడొతె రెగ్గయ్లి రితి,  
 †“నర్ల తెన్ జింక చి చెంగిలి సమయుమ్ దెకుక మెన  
 కో జలెకు ఇన్ఱుమ్ జయెదె గే,  
 జోవయించి చోడి కిచ్చొ గర్చి నే లట్టబ్బి రితి,  
 జోవయించ బట్టొ కిచ్చొ మోసిమ్ నే లట్టబ్బి రితి దెకన్ను.

11 దసా మాన్ను పాపుమ్ దూరి కెరన సత్తిమ్ ఇండుసు,  
 సేంతుమ్ చజ సేంతుమ్ ఇండుసు.

12 కిచ్చొక మెలె, పున్నిమ్ ఇండితసక ప్రబు దెకెదె,  
 జోవయించ ప్రార్దనల్ జో నూనెదె,

† 3:10 3:10 కీర్తనలు 34:12-16.

గని పాపుమ్ ఇండితనక జో దెకె నాయ్, నూనె నాయ్.”

13 చెంగిల్ కమొ కెర ఇండితి ఆస రితి తుమ్ ఇండిలె తుమ్క కో అర్ల కెరుల? కోయి నాయ్!

14 గని, సత్తిమ్ తుమ్ ఇండిలి రిసా ఏక్ వేల కో జలెకు అర్ల కెర్లె, దేముడు తుమ్క ‘చెంగిల్’ మెనెదె. దస అర్ల కెర్తసక తుమ్ బియఁ నాయ్. జోవయించి రిసా బమ్మ నే జతె,

15 ‘పరలోకుమ్చో ప్రబుయి జో’ మెన, తుమ్చి పెట్టి నిదానుమ్ క్రిస్తుక దెతి గవురుమ్ దాస. జో ప్రబుచి రిసాచి తుమ్చి పెట్టిచి దయిరిమ్చి రిసా కో “జేవ్చి సత్తిమ్క తుమ్ రుజ్జు దెకవ” మెన కెయఁ జవున్ తుమ్క పుసిలె, సరి జతి జబాబ్ దెంక తెయార్ జా తా. గని, †జబాబ్ దెంక జలె, బడాయ్ నెంతె మరియాద తెన్ లట్టబా.

16 అన్నె, ‘సత్తిమ్’ మెన తుమ్చి పెట్టి జాన్తిసి జర్గు కెర్తి రితి తుమ్ ఇండ, చి క్రిస్తుచి తెడి తుమ్ సత్తిమ్ ఇండితిన్చి రిసా తుమ్క బియడ్తన దూసుప కెర్లె, జేవ్ కెర్త నిందల్క ‘ఆరిచ’ మెన జేవ్ చినన, లాజ్ జవుల.

17 తప్పు కెర్లి రిసా సిచ్చ జతి కంట, సత్తిమ్ కెర్లి రిసా సిచ్చ జంక చెంగిలి. తుమ్ సత్తిమ్ కెర్లి రిసా సిచ్చ జంక ఏక్ వేల దేముడుచి నెలవ్ తయెదె.

18 మెలె, క్రిస్తుక దెకిలె, క్రిస్తు కి దస్సి, జో పూర్తి సత్తిమ్ తిలె కి, పాపుమ్ జలొసక ‘జోవయించి పాపుమ్ గెస్సు’ మెన జో మొర్లిన్ తెన్ అమ్చి పాపుమ్ పూర్తి గెచ్చవయ్ గెలన్. జా కీఎక్కి సుట్టు జో బలి జలిసి సరిపుచ్చుప జెయెదె. అమ్క దేముడు అబ్బొన్తె అన్నె కడ ఆన్తి రిసా మొర అమ్చి పాపుమ్ గెచ్చయ్లన్. ఈంజ లోకుమ్చి ఆగ్ రగుమ్క జోక మార్ల, గని జోచి ఆత్మక దేముడు అబ్బొసి జోక అన్నె \* జియడ్తన్.

‡ 3:15 3:15 మత్తయి 10:19, మార్కు 13:11, లూకా 12:12. § 3:18 3:18 రోమియుల్ 6:10, ఎబ్రియుల్ 7:27, 9:12, 28 చి 10:10 దెక. \* 3:18 3:18 లూకా 24:39 దెక. ఆత్మ రగుమ్చి ఆగ్ తెన్ యేసు అన్నె జలన్. కొరింథిల్క పవులు రెగిడ్లి ఏక్ నంబర్ ఉత్తమ్ 15:44, వీలిప్పియుల్ 3:21. చి ఎబ్రియుల్ 10:5 దెక.

19 జో మొర్లి పొది యేసు కేనె గెలన్ మెలె, బూలోకుమ్క ఎట్టో లోకుమ్తె జేలి జల, ఆకర్ దీసిచి పరిచ్చక సిచ్చక రకిత ఆత్మల్ తిలిన్తె జోవయించి ఆత్మక జో ఉత్త గెచ్చ, దేముడు అబ్బోన్చి కోడు సాడుప కెర్లన్.

20 అగ్గెయి, పూర్గమ్ పొది, †నోవహుచి కాలుమ్తె “అంక నంపజా రచ్చించుప జతు” మెన దేముడు సిచ్చ వాయిద కెర రకిలెకి, జో నోవహు, జా ఓడ బందితె తిలి పొది జోచి కోడు సూనుక నెసిలనచ ఆత్మల్క సుబుమ్ కబుర్ కోడు సాడుప కెర్లన్. జలె, జా ఓడతె తొక్కిజిని, మెలె, ఎక్కి అట్టు జిన్ మాన్సుల్ పానితె రచ్చించుప జల.

21 జా సమయుమ్తె జేవ్ దస్సి పానితె రచ్చించుప జలిసి, జలె, బాప్తిసుమ్క టాలి జతయ్. మెలె, పానితె బాప్తిసుమ్ జతిసి తుమ్క రచ్చించుప కెర్తి గుర్తు జతయ్. కీసి మెలె, తుమ్చి ఆగుచి ముర్కి, దొవన్తీన్చి రిసా నాయ్, గని యేసుక్రీస్తు అన్నె జీవ్ జా ఉట్టి రిసా దేముడుచి మొక్కె తుమ్చి పాపుమ్ గెలి గుర్తుయి బాప్తిసుమ్ దెకయ్తయ్. ప్రబుక నంపజలన జోవయించి బుద్ది మార్పుప జా ప్రబుకయ్ గవురుమ్ కెర్తి రితి ఇండుక ఇస్టుమ్ జలిన్చి గుర్తు బాప్తిసుమ్తెయి దెకయ్తతి.

22 జలె, జో క్రీస్తు జీవ్ జా ఉట్ట కెర పరలోకుమ్తె వెగ గెచ్చ, దేముడు అబ్బోన్చి ఉజెతో పక్క వెస తా, ‡దూతల్చి ఉప్పిరి, అదికారుల్చి ఉప్పిరి, సక్తుల్ ఎత్తిచి ఉప్పిరి ఏలుప కెర్తయ్.

## 4

అగ్గక బాదల్ సేడ్లె బుద్ది చెంగిల్ జతిన్చి కోడు

1-2 క్రీస్తు, జలె, మాన్సుచి జోచి ఆగుతె బాదల్ సేడ్లన్. జాకయ్, \*‘అమ్ కి జోచి రితి బాదల్ సేడ ఓర్పుప జమ’ మెన తుమ్ డిట్టుమ్

† 3:20 3:20 ఆదికాండుమ్ 6-9 అద్యయల్. ‡ 3:22 3:22 ఎపెసు 1:21, 6:12, కొలోస్సియుల్ 1:16, 2:10, 15, చి తీతు 3:1 దెక. \* 4:1-2 4:1-2 రోమియుల్ 8:17, వెలిప్పియుల్ 1:29-30, తిమోతిక పవులు రెగిడ్డి 2 నంబర్ ఉత్తమ్ 2:12.

కెరన. కిచ్చొక మెలె, జో తెన్ మెలి రితి అఱగుక కో బాదల్ సేడ తయెదె గే, ఒత్త తంతో ఈంజ అఱగి జితె ఎదిలి సేంపుక మాన్సుచ ఆసల్ రితి నాయ్, గని దేముడుచి ఇస్టుమ్ కిసి అస్సె గే, దస్సి ఇండుక మెన, జో మాన్సు పాపుమ్ ముల అస్సె.

3 దేముడుక నేన్లసచి రితిచి తుమ్చి అగ్గెచి ఇండుక అగ్గెయ్చి మెన, తుమ్ దసితె అన్నె గెచ్చు నాయ్. దేముడుక నేన్లస జోవయించి అఱగిచి ఆస ముద్దొ నే కెరంతి రితి, ఆసల్ రితి, మచ్చితి రితి, 'సర్ల కెర్తసుమ్' మెన వెట్కారుమ్ జతి రితి, 'సర్ల కెర్తసుమ్' మెన సూర్లు పితి రితి, వెట్కారుమ్ జా బొమ్మల్క జొకర్తి రితి జితతి.

4 తుమ్ అప్పె జోవయింతెన్ దస బుద్ది నెంజిల అలవాట్లుతె బెదున్ నాయ్ చి రిసా జేవ్ ఆచారిమ్ జా తుమ్క దూసుప కెర్తతి.

5 గని ఆకర్క, మొర్లసక జీవ్ తిలసక తీర్పు కెరుక తెయార్ జలో ప్రబుచి మొక్కె జేవ్ జోవయించి పాపుమ్ ఒప్పున సిచ్చు జంక అస్సె.

6 దస్సికయ్, † మొర్లసక కి సుబుమ్ కబుర్ నూనయ్లో కిచ్చొక మెలె, మాన్సుచి జోవయించి అఱగ్క మాన్సుల్ సేడ్డి జోవయించి పాపుమ్చి సిచ్చు జేవ్ జలెకి, దేముడు జోవయించి ఆత్మక కిసి జితయ్ గే, జేవ్ కి దస్సి జింక అవ్కాసుమ్ తంక.

7 ఈంజ ఎత్కిక ఆకర్ దీసి పాసి జా జెతయ్. జాకయ్, ప్రార్దనల్ కెర్తె తతి రిసా తుమ్ మచ్చిల్ రితి నే జితె తెలివి తా ముద్దొ కెరన, బుద్ది ఇండుక జాగర్త తా.

8 ముక్కిమ్క, ఎక్కిలోక ఎక్కిలో పూర్తి ప్రేమయ్ ఇండ దెకితె తా. దస్సి ప్రేమ దెరన. కిచ్చొక మెలె, ‡ ఒగ్గర్ తప్పుల్క ప్రేమయ్ ఓర్పువ జా చెమించుప కెర్తయ్.

† 4:6 4:6 3:19 దెక. ‡ 4:8 4:8 ఎత్కి అదికారుమ్ తిలో దేముడు అమ్చ ఒగ్గర్ తప్పుల్ జోవయించి ప్రేమయ్చి రిసా ఓర్పువ జా చెమించుప కెర్తయ్. దస్సి ప్రేమ అమ్చి పెట్టి తా, అమ్ కి దస్సి అన్నె మాన్సుల్చ తప్పుల్ ఓర్పువ జా చెమించుప కెరుక. వడ్డొ, అమ్ దస్సి ప్రేమ కెర్తె, జయి కి జో దెక అమ్క కన్కారుమ్ దెకెదె. మత్తయి 6:12, 14, 15 దెక.

9 అన్నె, తుమ్చితె ఎక్కిలోతె అన్నెక్లొ అయ్లె, కోపుమ్ నెంతె గడ్డు నెంతె, సర్ల తెన్ జోవయింక మరియాద కెర.

10 దేముడు తుమ్క కిచ్చొ సెక్తి దా తిలె, జోచి దయచ, జో దెత వేర వేర సెక్తివరల్ పొరపాట్ నెంతె జోచి బుద్ది రితి, అన్నె మాన్సుల్ చెంగిల్ తతి రితి తుమ్ వాడిక కెర దాసా.

11 దస్సి, బోదన కెర్తొసా జలె, దేముడుచి తెడి తా జొయ్యి దిల కొడొ లట్టబ్బు. దస్సి కి, కో అన్నె మాన్సుల్క తోడ్ కెర్తొసా జలె, దేముడు దెతి సెక్తికయ్ జో జా తోడ్ కామ్ కెర్చు. తుమ్ దస్సి ఇండిలెగిన, యేసుక్రీస్తుచి రిసా దేముడుచి గవురుమ్ ఎత్కితె రుజ్జు డీసెదె. కెయఁక తెయఁక జోవయింక గవురుమ్ అదికారుమ్ తవును!

**జెత బాదల్ చి రిసా దయిరిమ్ సంగితిసి, జాగర్ల సంగితిసి**

12 అన్నె, ప్రేమ తిల బావుడ్లు, తుమ్క అప్పె జెతికయ్ ఆగి మెలి రితిచి పరిచ్చుచి రిసా తుమ్ ఆచారిమ్ జా నాయ్. ‘అమ్క దస్సిచి కిచ్చొక లయిక?’ మెన తుమ్ ఉచర్లె, జా జర్గు జతిసి కిచ్చొ ఆచారిమ్చి నెంజె. కిచ్చొక తుమ్క జర్గు జతయ్ మెలె, తుమ్చి నిదానుమ్ పరిచ్చు జా రుజ్జు జంక.

13 ‘క్రీస్తు సేడ్ల బాదల్తె ఆమ్ కి బెదితనుమ్’ మెన తుమ్ సర్లసంతోసుమ్ జా, చి జోచి గవురుమ్ పూర్తి డీస్తి దీసిక ఒత్తయ్ కి జో తెన్ సర్లసంతోసుమ్ జస్తె.

14 “అమ్ నంపజలన” మెన తుమ్ ఒప్పున్లి రిసా మాన్సుల్ తుమ్క దూసుప కెర్లె, తుమ్క చెంగిలి. కిచ్చొక మెలె, దేముడుచి ఉజిడ్చి ఆత్మ తుమ్చి తెన్ తా గెచ్చు తుమ్క తోడు తా సెక్తి దెత తత్తయ్.

15 గని, మార్తోన్ జలెకి, ‘చోర్తోన్’ జలెకి, ‘నేరిమ్ కెర్లొసా’ జలెకి, ‘వేర మాన్సుల్చి కామ్చి నెడిమి జా పోటి కెర్లొసా’ జలెకి, మెన తుమ్చితె కక్క, కో నింద కెర్తి రితి వాట్ దాన నాయ్. దన కమొ కెర బాద సిడ్త తుమ్క చెంగిల్ నాయ్.

16 గని, 'నంపజలన' మెన తుమ్ ఒప్పున్ని రిసాయి తుమ్చితె కో కచి అత్తి బాదల్ సేడ్లె, లాజ్ జంక నాయ్. 'నంపజలన' మెన జా నావ్ దెరన్లసి చెంగిల్ మెన, జో నంపజలన దేముడుక గవురుమ్ దెవుసు!

17 కిచ్చొక మెలె, దేముడు మాన్సుల్క పరిచ్చు కెర్తి సిచ్చు కెర్తి సమయుమ్ పాసి జా అస్సె. జలె, జో పరిచ్చు కెర్తిసి తీర్పు కెర్తిసి అమ్ నంపజలనతెయ్ మొదొల్ జతయ్ జలె, దేముడుచి నుబుమ్ కబుర్ రితి ఇండుక నెసిత మాన్సుల్ ఆకర్క కెర్తి సిచ్చు జవుల!

18 జో దేముడు పూర్గుమ్ రెగ్గయ్లి రితి;

\*"సత్తిమ్ జలొ మాన్సు †కస్సనె రచ్చించుప జతయ్ జలె, దేముడుక నే బితన, పాపుమ్ కెర్లన, కీసి రచ్చించుప జవుల! రచ్చించుప జంక నెత్తిరి!"

19 జాకయ్, దేముడుక నిదానుమ్ తా జోవయించి సెలవ్క కో ఈంజ లోకుమ్తె సిచ్చల్ అర్ల సేడ్తతి గే, ఎత్కిక జెర్మున్ కెర్లొ నిదానుమ్ తిలొ జో దేముడుచి అత్తి జోవయించ ఆత్మల్ సార్పు కెర దా, చెంగిల్ కమొ కెరె తత్తు!

## 5

### సంగుమ్చ వెల్లెల మాన్సుల్ కీసి ఇండుక

1 తుమ్చి తెచ సంగుమ్చ వెల్లెల మాన్సుల్క, జలె, ఆవ్ ఏక్ కోడు సంగిదె. తుమ్చి తెన్ కి నంపజలనక ఆవ్ వెల్లొ జలొసా తా, క్రిస్తు సేడ్లె బాదల్ సొంత దెకిలొసా జా, పడ్డొ తెదొడ్క రుజ్జు జా డీసుక తిలి పరలోకుమ్చి ఉజిడతె గవురుమ్తె బెదితోసా జా, ఆవ్ తుమ్తెచ వెల్లొ మాన్సుక కిచ్చొ బతిమాల్పా జా సంగితసి మెలె,

2 తూమ్ దెకితి వాట దేముడుచ మెండల్ జల నంపజలనక తుమ్ నిదానుమ్ దెకితె తా, తుమ్క కో బలవంతుమ్ కెర్తి రితి నాయ్, గని దేముడుచి ఇస్టుమ్ రితి పూర్తి మెన్సు దా జోవయింక సర్ల తెన్ దెకితె తా. డబ్బుల్ ఆసక నాయ్, గని సర్లబుద్ది తెన్ కెరె తా.

\* 4:18 4:18 సామెతల్ 11:31. † 4:18 4:18 కస్సనె మెలె, రచ్చించుప నే జలి రితి జా కీసి గే రచ్చించుప జతయ్.

3 పడ్డొ, జా మందతెచ మాన్సుల్క బియడ్డి రగుమ్ ఏలుప కెర నాయ్, గని జేవ్ కిసి సత్తిమ్ ఇండుక గే దెకిత్ రితి తూమ్ దస్సి సత్తిమ్ ఇండ దెకవ.

4 తూమ్ దస్సి ఇండ వాట్ దెకయ్లదు మెలె, ఎత్తిచి కంట వెల్లొ గొవుడు జతో క్రీస్తు ఆకర్ దీసిక ఎత్తిజిన్క డీస్తి పొదిక ప్రబుచి గవురుమ్ నే గెతి బవుమానుమ్ తుమ్ ఎత్తిజిన్క దొర్కు జయెదె.

5 పడ్డొ, సంగుమ్క దెకిత వెల్లెల మాన్సుల్చి తెడి తుమ్ అన్నె నంపజలస దాక్ కెరన, జేవ్ వెల్లెల మాన్సుల్చి కోడుక మరియాద కెర. తుమ్ ఎత్తిజిన్ సొంత గవురుమ్ నే ఉచరంతె, ఎక్కిలోచి మొక్కె ఎక్కిలో దాక్ కెరన, ఎక్కిలోచి సేవ ఎక్కిలో కెర. పూర్ణమ్ దేముడుచి కొడతె రెగ్గయ్లి రితి,

\*“సొంత గవురుమ్ ఉచరంతసక దేముడు దూరి కెర్తయ్,

గని కో దాక్ కెరనుల గే,

జోవయింకయ్ జోచి దయచి తోడు జో దెయెదె”

మెన రెగిడ్డి కోడు.

6 జాకయ్, ఎత్తిచి కంట సెక్తి తిలో దేముడుచి అత్తి తుమ్చి బత్తు సొర్పు కెర దా జోచి తెడి దాక్ కెరన, చి జో ఒప్పన్లి సమయుమ్క గవురుమ్ తెన్ తుమ్క టీవడెదె.

7 బాదల్ సేడ్డి తుమ్చి బయిమ్ ఎత్తి జో వయితి రితి తుమ్ సొర్పు కెర దాస. కిచ్చొక మెలె, తుమ్క ‘చెంగిల్ తత్తు’ మెన, తుమ్చ బాదల్ వయిక జో ఇస్టుమ్ జతయ్.

8 మచ్చిల్ రితి బుద్ది నే జతె తుమ్ ముద్దొ కెరన, తెలివి తా జాగర్త తా. కిచ్చొక మెలె, తుమ్క నేరిమ్ వయడుక ఇస్టుమ్ జలో సయ్తాన్ కక్క జలెకు గీడుక కోర్వ జా, ఒర్నితో సింవుమ్చి రితి బులితె తత్తయ్.

9 ఒండి లోకుమ్చ బావుడ్డు జల నంపజలన్క కి ఇస బాదల్ సేడుక అస్సె మెన జాన, తుమ్చి నముకుమ్ డిట్టుమ్ తా జో సయ్తాన్చి ఉప్పిరి జినుక తుమ్ టీవ.

\* 5:5 5:5 సామెతల్ 3:34, యాకోబు 4:6.



10 అన్నె, గడియ బాదల్ సేడ ఓర్పువ జలదు మెలె, క్రీస్తుచి నావ్ తెన్ తుమ్ జోచి కెయఁక తెయఁక తతి పరలోకుమ్చి ఉజిడతె గవురుమతె బెదుక మెన తుమ్క నిసాన బుకార్లొ ఎత్తి దయ కెర్తొ దేముడు సొంత తుమ్క పూర్తి కెర, డిట్టుమ్ కెర, జిన్తి సెక్తి దెయెదె.

11 జో కెయఁక తెయఁక ఏలుప కెర్పు! ఏలుప కెరెదె. జోక జోబర! ఆమేన్.

### ఆకర్ కోడు

12 'ఈంజ సుబుమ్ కబుర్ నిజువి దేముడు దిలిసి' మెన సాచి సంగ తుమ్క డిట్టుమ్ కెరుక మెన, జోక 'నిదానుమ్ తిలో బావొ' మెన సిల్వానస్క నంపజా జోచి అత్తి తుమ్క ఈంజ ఉత్తుమ్ రెగ్గవ అస్సి. ప్రబు దిలి ఈంజ నిజుమ్ జలి దయతె తుమ్ డిట్టుమ్ టీవ.

13 దేముడు అమ్క తుమ్క కీసి నిసాన అస్సె గే, దస్సి 'అంచయ్ మాన్సుల్ జతు' మెనయ్ ఈంజ †బబులోను పట్టుమ్తె కి మాన్సుల్క నిసాన అస్సె. జో నిసాన్లిసి ఈంజ సంగుమ్చ కి తుమ్క జోవయించి జోబర సంగితతి. అంక పుత్తు జలో రితో మార్కు జోచి జోబర సంగితయ్.

14 ప్రబుచి ప్రేమక తుమ్ ఎక్కిలోక ఎక్కిలో జోకర.

క్రీస్తుచి తెడిచ తుమ్ ఎత్తిజిన్క జోచి సేంతుమ్ తవున్!

† 5:13 5:13 'బబులోను' మెలె, ఏక్ వేల రోమ్ పట్టుమ్క టాలి జతయ్. డీనయ్లిసి 17 అద్యయిమ్చి జా అద్యయిమ్తెచ కొడెచ ఎట్టొచ కొడె దెక.

**Kupia New Testament**  
**Kupia: Kupia New Testament (New Testament)**

copyright © 2019 Wycliffe Bible Translators, Inc.

Language: (Kupia)

Contributor: SIL International (in Asia)

All rights reserved.

2020-11-18

---

PDF generated using Haiola and XeLaTeX on 1 Oct 2024 from source files  
dated 29 Jan 2022

7ccb2690-4432-5e86-88c1-f8ee976f30f4